

U stavu (2) broj „45“ zamjenjuje se brojem „48“.  
 U stavu (3) broj „46“ zamjenjuje se brojem „49“.  
 U stavu (4) broj „47“ zamjenjuje se brojem „50“.  
 U stavu (5) broj „48“ zamjenjuje se brojem „51“.  
 U stavu (6) broj „49“ zamjenjuje se brojem „52“.  
 U stavu (7) broj „50“ zamjenjuje se brojem „53“.  
 U stavu (8) broj „51“ zamjenjuje se brojem „54“.  
 U stavu (9) broj „52“ zamjenjuje se brojem „55“.  
 U stavu (10) broj „53“ zamjenjuje se brojem „56“.

#### Član 10.

U članu 80. u stavu (1) broj „54“ zamjenjuje se brojem „57“.  
 U stavu (2) broj „55“ zamjenjuje se brojem „58“.  
 U stavu (3) broj „56“ zamjenjuje se brojem „59“.  
 U stavu (4) broj „57“ zamjenjuje se brojem „60“.

#### Član 11.

U članu 81. u stavu (1) broj „58“ zamjenjuje se brojem „61“.  
 U stavu (2) broj „59“ zamjenjuje se brojem „62“.

#### Član 12.

U članu 82. u stavu (1) broj „60“ zamjenjuje se brojem „63“.  
 U stavu (2) broj „61“ zamjenjuje se brojem „64“ i na kraju stava tačka se zamjenjuje zarezom i dodaje tekst koji glasi: „izuzev dijela sredstava namijenjenih za izgradnju Doma kulture u općini Sapna koja će se rasporediti na osnovu posebne odluke resornog ministarstva na koju saglasnost daje Vlada Kantona.“  
 U stavu (3) broj „62“ zamjenjuje se brojem „65“.

#### Član 13.

Ovaj zakon stupa na snagu danom objavljivanja u „Službenim novinama Tuzlanskog kantona“.

BOSNA I HERCEGOVINA  
 -Federacija Bosne i Hercegovine-  
 TUZLANSKI KANTON  
 S K U P Š T I N A

PREDSJEDNIK  
 SKUPŠTINE TUZLANSKOG  
 KANTONA

Broj: 01-02-539-4/23  
 Tuzla, 30.10.2023. godine

Žarko Vujović, v.r.

## 978

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 30.10.2023. godine, donosi

## ZAKON

### O PRUŽANJU BESPLATNE PRAVNE POMOĆI

#### I. OPĆE ODREDBE

##### Član 1.

##### (Predmet zakona)

Ovim zakonom reguliše se ostvarivanje prava na besplatnu pravnu pomoć, i to: subjekti za pružanje besplatne pravne pomoći, oblici ostvarivanja besplatne pravne pomoći, korisnici besplatne pravne pomoći, uslovi i način za ostvarivanje, organ nadležan za pružanje besplatne pravne pomoći u Tuzlanskom kantonu (u daljem tekstu: Kanton), prava, dužnosti i ovlaštenja pravnih zastupnika i drugih zaposlenika Kantonalnog zavoda za pružanje pravne pomoći (u daljem tekstu: Zavod), finansiranje

i kontrola pružanja besplatne pravne pomoći, nadzor nad provođenjem ovog zakona, kao i druga pitanja od značaja za pružanje besplatne pravne pomoći.

##### Član 2.

##### (Cilj Zakona)

(1) Cilj ovog zakona je osigurati svakom fizičkom licu djelotvoran i jednak pristup pravdi u postupku i pred organima i institucijama, pred kojima se ostvaruju ili štite pojedinačna prava, obaveze ili interesi.

(2) Cilj iz stava (1) ovog člana provodi se uspostavljanjem djelotvornog sistema pružanja besplatne pravne pomoći.

##### Član 3.

##### (Besplatna pravna pomoć i minimum prava)

(1) Besplatna pravna pomoć je oblik ostvarivanja prava fizičkog lica na pravično suđenje i jednak pristup pravdi pred sudom i drugim organima, čiji troškovi, prilikom pružanja pravne pomoći od strane Zavoda, u cijelosti padaju na teret budžeta Kantona.

(2) Odobrena besplatna pravna pomoć može se ograničiti ili ukinuti samo iz razloga propisanih ovim zakonom.

(3) Fizičko lice koje ostvari pravo na besplatnu pravnu pomoć pred Zavodom, u mjestu svog prebivališta, odnosno boravišta, uživa to pravo na teritoriji Bosne i Hercegovine, u skladu sa zakonom.

(4) Prava utvrđena u ovom zakonu predstavljaju minimum prava koja se drugim kantonalnim zakonima i propisima, odnosno aktima gradskog ili općinskog vijeća ne mogu umanjivati.

##### Član 4.

##### (Značenje izraza)

Pojedini izrazi koji se koriste u ovom zakonu imaju sljedeća značenja:

a) Pravo na besplatnu pravnu pomoć - predstavlja pravo fizičkog lica da, uz ispunjenje propisanih uslova, traži i dobije pravnu pomoć od nadležnih organa za pružanje besplatne pravne pomoći;

b) Korisnik besplatne pravne pomoći - je fizičko lice kojem je odobrena besplatna pravna pomoć u skladu sa odredbama ovog zakona;

c) Oblik ostvarivanja besplatne pravne pomoći - predstavlja radnje i postupke kojima se korisniku besplatne pravne pomoći omogućava zaštita prava na pravično suđenje i jednak pristup pravdi;

d) Član porodičnog domaćinstva korisnika besplatne pravne pomoći - je fizičko lice utvrđeno Porodičnim zakonom Federacije Bosne i Hercegovine („Službene novine Federacije Bosne i Hercegovine“, br. 35/05, 41/05, 31/14 i 32/19);

e) Nadležni organ za pružanje pravne pomoći u Kantonu - je Zavod;

f) Međunarodnom konvencijom - smatra se svaki međunarodni akt koji se odnosi na pravo pojedinca na pravično suđenje i jednak pristup pravdi, a koje je Bosna i Hercegovina ratifikovala.

##### Član 5.

##### (Subjekti pružanja besplatne pravne pomoći)

(1) Besplatnu pravnu pomoć u skladu s odredbama ovog zakona pruža Zavod.

(2) Besplatnu pravnu pomoć mogu pružati i advokati koji su članovi advokatskih komora u Bosni i Hercegovini, udruženja i fondacije registrovane za pružanje besplatne pravne pomoći i drugi subjekti, u skladu sa posebnim zakonima.

## II. OBLICI OSTVARIVANJA BESPLATNE PRAVNE POMOĆI

### Član 6.

#### (Oblici ostvarivanja besplatne pravne pomoći)

(1) Besplatna pravna pomoć u okvirima nadležnosti Zavoda ostvaruje se u vidu:

- a) davanja usmenih pravnih savjeta;
- b) sastavljanja različitih podnesaka (tužbe, žalbe, molbe, zahtjevi, prigovori, predstavke i dr.);
- c) odbrane u krivičnom postupku i zastupanja stranaka u skladu sa zakonima o krivičnom postupku u Bosni i Hercegovini;
- d) odbrane u prekršajnom postupku i zastupanja stranaka u skladu sa zakonima o prekršajnom postupku u Bosni i Hercegovini;
- e) zastupanja pred sudom;
- f) zastupanja pred organima uprave i upravnim organizacijama;
- g) preduzimanja drugih radnji u cilju zaštite prava i pravnih interesa korisnika besplatne pravne pomoći.

(2) Pravna pomoć iz stava (1) ovog člana pruža se bez naknade, ako ovim zakonom nije drugačije propisano.

(3) Pravo na besplatnu pravnu pomoć iz stava (1) ovog člana, ne podrazumijeva pravo na oslobođanje od plaćanja sudskih i administrativnih taksi.

### Član 7.

#### (Postupci u kojima se pruža besplatna pravna pomoć)

(1) Besplatna pravna pomoć se pruža korisnicima besplatne pravne pomoći u postupcima u kojim se ostvaruju i štite njihova prava i na zakonu zasnovani pravni interesi.

(2) Postupci iz stava (1) ovog člana su:

- a) parnični postupak;
- b) vanparnični postupak;
- c) izvršni postupak;
- d) krivični postupak u skladu sa zakonima o krivičnom postupku u Bosni i Hercegovini;
- e) prekršajni postupak;
- f) upravni postupak i
- g) upravni spor.

(3) U skladu sa odredbama ovog zakona, pružanje besplatne pravne pomoći osigurava se i u postupcima podnošenja revizije Vrhovnom sudu Federacije Bosne i Hercegovine, apelacije Ustavnom sudu Bosne i Hercegovine i zahtjeva Evropskom sudu za ljudska prava za zaštitu ljudskih prava, ako međunarodnim ugovorom nije drugačije utvrđeno.

### Član 8.

#### (Postupci u kojima se ne pruža besplatna pravna pomoć)

Besplatna pravna pomoć ne pruža se u sljedećim postupcima:

- a) postupak pred privrednim odjeljenjima nadležnih sudova;
- b) postupak upisa u registar privrednih društava;
- c) postupak registracije obrtničke djelatnosti;
- d) postupak registracije udruženja ili fondacija;
- e) postupak pred nadležnim poreznim organima;
- f) sastavljanje privatnih isprava i ugovora;
- g) pribavljanja lokacijskih uslova i građevinske dozvole, kao i u drugim pravnim radnjama u vezi sa građenjem.

### Član 9.

#### (Evidencija)

(1) O pruženju besplatnoj pravnoj pomoći Zavod vodi evidenciju u pisanoj i elektronskoj formi, a način vođenja i sadržaj evidencija propisuje se pravilnikom koji donosi ministar pravosuđa i uprave Tuzlanskog kantona (u daljem tekstu: ministar).

(2) Prilikom prijema, evidentiranja i raspoređivanja predmeta, kao i njihovog arhiviranja primjenjuju se propisi o kancelarijskom i arhivskom poslovanju organa državne službe.

## III. KORISNICI BESPLATNE PRAVNE POMOĆI

### Član 10.

#### (Korisnik besplatne pravne pomoći)

(1) Korisnik besplatne pravne pomoći (u daljem tekstu: korisnik), je fizičko lice kome se pruža besplatna pravna pomoć prema uslovima propisanim ovim zakonom, i to:

- a) državljanin Bosne i Hercegovine koji ima prebivalište, odnosno boravište na području Kantona;
- b) državljanin Bosne i Hercegovine - povratnik, koji je prije povratka u prijeratno mjesto stanovanja imao status raseljenog lica na području Kantona, osim ostvarivanja prava na odbranu po službenoj dužnosti;
- c) strani državljanin ili lice bez državljanstva (apatrid) koje se nalazi na teritoriji Bosne i Hercegovine pod međunarodnom zaštitom, a naročito tražilac azila, izbjeglica, lice pod privremenom ili supsidijarnom zaštitom, lice u postupku protjerivanja, žrtva trgovine ljudima, u skladu s obavezama koje Bosna i Hercegovina ima prema međunarodnim konvencijama, ukoliko im pravna pomoć nije osigurana posebnim zakonom.

### Član 11.

#### (Obaveza zastupanja po međunarodnim konvencijama)

Besplatna pravna pomoć se pruža građanima u skladu sa međunarodnim konvencijama.

### Član 12.

#### (Zabrana diskriminacije)

Korisnik ima pravo na besplatnu pravnu pomoć, pod uslovima propisanim ovim zakonom, bez obzira na njegovu rasu, boju kože, jezik, vjeru, etničku pripadnost, nacionalno ili socijalno porijeklo, veze sa nacionalnom manjinom, političko ili drugo uvjerenje, članstvo u sindikatu ili drugom udruženju, obrazovanje, spol, spolno izražavanje ili orijentaciju, kao i svaku drugu okolnost koja ima za svrhu ili posljedicu da mu onemogućuje ili ugrožava priznavanje, uživanje ili ostvarivanje na ravnopravnoj osnovi prava utvrđenih ovim zakonom.

## IV. USLOVI, KRITERIJI I NAČIN OSTVARIVANJA BESPLATNE PRAVNE POMOĆI

### Član 13.

#### (Uslovi za ostvarivanje prava na besplatnu pravnu pomoć)

(1) Pravo na besplatnu pravnu pomoć ima korisnik iz člana 10. ovog zakona, koji nema dovoljno imovine ili drugih sredstava da plati troškove advokatskih usluga i troškove zastupanja, pod uslovom da ispunjava kriterije utvrđene ovim zakonom.

(2) Pravo na odbranu i zastupanje u krivičnom postupku pred organima iz člana 28. stav (2) ovog zakona od strane pravnih zastupnika Zavoda imaju i fizička lica koja nemaju prebivalište na području Kantona, pod uslovima iz stava (1) ovog člana.

### Član 14.

#### (Kriteriji za ostvarivanje prava na besplatnu pravnu pomoć)

(1) Pravo na besplatnu pravnu pomoć ima fizičko lice ako je slabog imovnog stanja.

(2) Pravo na besplatnu pravnu pomoć, osim lica iz stava (1) ovog člana, može ostvariti i lice bez imovine u smislu odredbi člana 16. stav (1) ovog zakona, koje ispunjava bilo koji od sljedećih kriterija:

- a) lice koje po osnovu socijalne zaštite ostvaruje pravo na stalnu novčanu pomoć, prema kantonalnim propisima o socijalnoj zaštiti;

- b) nezaposleno lice;
- c) penzioner koji prima najnižu penziju ili srazmjernu INO penziju, koja zajedno sa samostalnom penzijom ne prelazi iznos najniže penzije;
- d) dijete bez roditeljskog staranja;
- e) lice kojem je oduzeta poslovna sposobnost i duševno oboljelo lice, smješteno u određenu ustanovu;
- f) žrtva nasilja u porodici ili nasilja na osnovu spola;
- g) član porodice šehida, poginulog borca, ratni vojni invalid i dobitnik ratnog priznanja i odlikovanja u stvarima zaštite i ostvarivanju njegovih prava po tim osnovama;
- h) demobilisani borac;
- i) žrtve seksualnog nasilja tokom oružanog sukoba u Bosni i Hercegovini i
- j) lica pod međunarodnom zaštitom iz člana 10. tačka c) ovog zakona.

#### Član 15.

##### (Dokazivanje statusa)

(1) Status lica iz člana 14. stav (2) ovog zakona dokazuje se odgovarajućom dokumentacijom izdatom od nadležnog organa kojim je utvrđen status tog lica.

(2) Status lica iz člana 10. tačka b) ovog zakona, osim dokumentacijom propisanom stavom (1) ovog člana, dokazuje se odgovarajućim uvjerenjem o ostvarenom statusu raseljenog lica izdatim od strane gradskog odnosno općinskog organa za upravu na čijem području je to lice ostvarilo status raseljenog lica.

#### Član 16.

##### (Lice slabog imovnog stanja)

(1) Licem slabog imovnog stanja se, po odredbama ovog zakona, smatra fizičko lice čija ukupna redovna primanja i prihodi po članu domaćinstva ne prelaze iznos od 40% prosječne isplaćene mjesečne neto plaće zaposlenih u Federaciji Bosne i Hercegovine prema posljednjim objavljenim podacima Federalnog zavoda za statistiku, a nema nekretnine ili drugu imovinu koja može biti predmet izvršenja shodno odredbama Zakona o izvršnom postupku („Službene novine Federacije Bosne i Hercegovine“, br. 32/03, 52/03, 33/06, 39/06, 39/09, 74/11, 35/12 i 46/16).

(2) Ne smatra se licem slabog imovnog stanja ono lice koje živi u zajedničkom domaćinstvu sa punoljetnim članom svoje porodice, koji je takvog imovnog stanja da je u mogućnosti da snosi njegove troškove advokatskih usluga.

(3) Kod utvrđivanja slabog imovnog stanja lica iz stava (1) ovog člana, neće se uzimati u obzir ukupan prihod i imovina članova porodice korisnika besplatne pravne pomoći koji s njim žive u zajedničkom domaćinstvu, a protustranka su u postupku ili je njihov interes u suprotnosti sa interesom podnosioca zahtjeva.

(4) Pod приходima, nekretninom ili drugom imovinom lica iz stava (1) ovog člana podrazumijevaju se prihodi, nekretnine i druga imovina koja je kantonalnim propisima o socijalnoj zaštiti propisana kao uslov za ostvarivanje prava na stalnu novčanu pomoć.

#### Član 17.

##### (Kriterij očigledne neosnovanosti)

(1) Besplatna pravna pomoć neće se odobriti podnosiocu zahtjeva ili će se otkazati ukoliko je odobrena:

- a) ako se iz samog zahtjeva, dokaza i činjenica na kojima se zasniva zahtjev očigledno može zaključiti da je takav zahtjev neosnovan;
- b) ako se radi o neopravdanom vođenju postupka;
- c) ako se radi o zloupotrebi prava na besplatnu pravnu pomoć;

- d) ako postoji sukob interesa;
- e) ako nisu ispunjeni uslovi iz člana 13. ovog zakona.

(2) Smatrat će se da je riječ o neopravdanom vođenju postupka kada je podnosilac zahtjeva u očiglednom nesrazmjeru sa stvarnim izgledom za uspjeh, kao i kada želi da vodi postupak radi postizanja svrhe koja je suprotna načelima poštenja i morala.

(3) Smatrat će se da je riječ o zloupotrebi prava na besplatnu pravnu pomoć, ako je podnosilac zahtjeva dao netačne podatke o ispunjavanju kriterija iz ovog zakona ili ako u slučaju promijenjenih okolnosti u toku vođenja postupka, prema kojima ne bi imao pravo na besplatnu pravnu pomoć, nije Zavodu prijavio te promijenjene okolnosti.

(4) Sukob interesa postoji kada dva ili više lica podnesu zahtjev za pružanje besplatne pravne pomoći sa suprotstavljenim interesima, u kom slučaju prednost ima ona stranka koja je prva podnijela zahtjev za pružanje besplatne pravne pomoći, ukoliko ispunjava uslove propisane ovim zakonom.

(5) Besplatna pravna pomoć se neće odobriti ili će se otkazati licu koje se ponaša izrazito nasilnički, nepristojno i uvredljivo prema pravnom zastupniku ili drugom zaposleniku Zavoda.

#### Član 18.

##### (Zahtjev za pružanje besplatne pravne pomoći)

(1) Zahtjev za pružanje besplatne pravne pomoći, uz priložene dokaze o ispunjavanju uslova propisanih ovim zakonom, podnosi se Zavodu.

(2) Podnosilac zahtjeva prilaže uz zahtjev svoju ovjerenu pisanu izjavu i ovjerenu pisanu izjavu punoljetnih članova svog porodičnog domaćinstva o imovnom stanju, kao i svoju ovjerenu izjavu i pisanu izjavu punoljetnih članova svog porodičnog domaćinstva o dopuštanju uvida u sve podatke o imovini i приходima.

(3) Za tačnost podataka navedenih u zahtjevu, podnosilac zahtjeva odgovara krivično i materijalno.

#### Član 19.

##### (Provjera podataka)

(1) Zavod, prema vlastitoj procjeni, provjerava činjenice navedene u izjavama o imovinskom stanju iz člana 18. stav (2) ovog zakona.

(2) Na zahtjev Zavoda, organi i pravna lica dužni su dostaviti podatke kojima raspolažu ili vode evidencije o činjenicama navedenim u izjavama iz stava (1) ovog člana.

(3) Ako se nakon podnošenja zahtjeva za pružanje besplatne pravne pomoći provjerom utvrdi da je podnosilac zahtjeva naveo netačne podatke, direktor Zavoda donosi rješenje kojim odbija zahtjev za pružanje besplatne pravne pomoći ili otkazuje dalje pružanje besplatne pravne pomoći.

#### Član 20.

##### (Rješenje)

(1) O zahtjevu za pružanje besplatne pravne pomoći i o otkazivanju odobrene besplatne pravne pomoći odlučuje direktor Zavoda rješenjem, bez odlaganja, a najkasnije u roku od 15 dana od dana podnošenja zahtjeva, odnosno utvrđivanja uslova za otkazivanje odobrene besplatne pravne pomoći, shodno odredbama Zakona o upravnom postupku („Službene novine Federacije Bosne i Hercegovine“, br. 2/98, 48/99 i 61/22).

(2) Ako bi podnosilac zahtjeva zbog isteka roka izgubio pravo na preduzimanje radnje za koju je podnio zahtjev, direktor Zavoda je dužan odlučiti o zahtjevu i u roku kraćem od roka iz stava (1) ovog člana, a koji podnosiocu zahtjeva omogućava blagovremeno preduzimanje radnje za koju je podnio zahtjev.

(3) Na zahtjev za pružanje besplatne pravne pomoći i rješenje kojim se odlučuje o zahtjevu ne plaćaju se takse.



(4) Rješenja iz stavova (1) i (2) ovog člana su konačna i protiv njih nije dopuštena žalba, ali se može pokrenuti upravni spor podnošenjem tužbe nadležnom sudu.

#### Član 21.

##### (Vremensko važenje odobrene besplatne pravne pomoći)

(1) Odobrena besplatna pravna pomoć važi do pravosnažnog okončanja postupka za koji je odobrena, ukoliko ranije nije opozvana ili otkazana.

(2) U izuzetno opravdanim slučajevima, direktor Zavoda može odobriti besplatnu pravnu pomoć i za postupke po vanrednim pravnim lijekovima i za postupke iz člana 7. stav (3) ovog zakona, samo ukoliko je Zavod zastupao korisnika u postupku koji je pravosnažno okončan.

#### Član 22.

##### (Prestanak prava na besplatnu pravnu pomoć)

(1) Pravo na odobrenu besplatnu pravnu pomoć prestaje:

a) pisanom izjavom korisnika da odustaje od već odobrene besplatne pravne pomoći;

b) otkazom odobrene besplatne pravne pomoći i

c) smrću korisnika.

(2) U slučaju iz stava (1) ovog člana, direktor Zavoda donosi rješenje o prestanku prava na besplatnu pravnu pomoć.

(3) Rješenje iz stava (2) ovog člana je konačno i protiv njega nije dopuštena žalba, ali se može pokrenuti upravni spor podnošenjem tužbe nadležnom sudu.

#### Član 23.

##### (Povrat troškova postupka)

(1) Kada je korisnik potpuno ili djelomično uspio u postupku i budu mu dosuđeni troškovi postupka, dužan je, u roku od 30 dana od pravosnažnosti odluke, vratiti u budžet Kantona iznos troškova ostvarenih po osnovu odobrene besplatne pravne pomoći o čemu se donosi posebno rješenje.

(2) Na rješenje iz stava (1) ovog člana primjenjuju se odredbe člana 20. ovog zakona.

#### Član 24.

##### (Promijenjene okolnosti i obaveza vraćanja sredstava)

(1) Korisnik, u periodu od odobravanja besplatne pravne pomoći do okončanja postupka, dužan je da obavještava Zavod o promjenama svih činjenica i okolnosti koje su od uticaja za ostvarivanje prava na besplatnu pravnu pomoć, o čemu se stranka obavještava prilikom podnošenja zahtjeva.

(2) Promjene iz stava (1) ovog člana, korisnik mora da prijavi u roku od osam dana od dana saznanja za promjene.

(3) Kada se u toku postupka donese rješenje o otkazivanju besplatne pravne pomoći zbog zloupotrebe prava na besplatnu pravnu pomoć ili se utvrdi da se imovno stanje korisnika ili članova njegovog porodičnog domaćinstva bitno izmijenilo tako da je isti u mogućnosti potpuno ili djelomično vratiti troškove za pruženu besplatnu pravnu pomoć, korisnik je dužan vratiti u budžet Kantona sredstva utrošena na pružanje besplatne pravne pomoći, o čemu se donosi posebno rješenje.

(4) Na rješenje iz stava (3) ovog člana primjenjuju se odredbe člana 20. ovog zakona.

#### Član 25.

##### (Način obračuna troškova i utrošenih sredstava i njihova pripadnost)

Naknada i troškovi za obavljanje radnji besplatne pravne pomoći i zastupanja obračunavaju se prema advokatskoj tarifi, dok se ostali troškovi utvrđuju na osnovu odgovarajuće dokumentacije, a prihod su budžeta Kantona.

#### Član 26.

##### (Plaćanje troškova branioca)

(1) Kada se sazna za činjenice i okolnosti na osnovu kojih se može utvrditi da neko lice nije slabog imovnog stanja po kriterijima utvrđenim ovim zakonom, a kome je pravni zastupnik postavljen kao branilac u smislu odredbe člana 40. stav (3) ovog zakona, postavljeni branilac će bez odlaganja zatražiti da bude razriješen te dužnosti.

(2) U zahtjevu za razrješenje iz stava (1) ovog člana će se ujedno zatražiti da sud obaveže lice iz stava (1) ovog člana da plati Zavodu naknadu i troškove za obavljene radnje pravne pomoći i zastupanja, obračunate shodno članu 25. ovog zakona.

#### V. ZAVOD

#### Član 27.

##### (Status, organizacija i način funkcionisanja Zavoda)

(1) Zavod je samostalna upravna organizacija Kantona, koja je osnovana i čije su nadležnosti utvrđene Zakonom o ministarstvima i drugim organima uprave Tuzlanskog kantona - prečišćeni tekst („Službene novine Tuzlanskog kantona“, broj: 10/18).

(2) Organizacija i način funkcionisanja Zavoda regulisani su odredbama Zakona o organizaciji organa uprave u Federaciji Bosne i Hercegovine („Službene novine Federacije Bosne i Hercegovine“, br. 35/05 i 24/13), kao i odredbama ovog zakona.

#### Član 28.

##### (Nadležnosti Zavoda)

(1) Zavod osigurava pružanje besplatne pravne pomoći licima slabog imovnog stanja, na način i pod uslovima utvrđenim ovim zakonom.

(2) Zavod osigurava pružanje pravnih savjeta i odbrane i zastupanje građana slabog imovnog stanja i preduzima sve radnje pred sudovima na području Kantona, Kantonalnim tužilaštvom, kao i drugim organima Kantona.

(3) Pravni zastupnici mogu preduzimati radnje i pred drugim pravosudnim organima van područja Kantona, uz prethodnu saglasnost direktora Zavoda.

(4) Zavod će pružati usluge besplatne pravne pomoći u svim općinama i gradovima Kantona, po načelu „Pravni dani“.

(5) Pravilnik o načinu pružanja besplatne pravne pomoći po načelu „Pravni dani“ donosi ministar.

#### Članak 29.

##### (Javnost rada i izvještavanje)

(1) Zavod osigurava kontinuirano pružanje informacija javnosti o ciljevima, načinu osiguranja i drugim pitanjima iz oblasti pružanja besplatne pravne pomoći.

(2) Radi praćenja i unapređenja besplatne pravne pomoći Zavod podnosi Vladi Tuzlanskog kantona (u daljem tekstu: Vlada Kantona) godišnji izvještaj o radu s prijedlogom mjera za unapređenje sistema pružanja besplatne pravne pomoći, koji sadrži podatke o kategoriji i broju korisnika, područjima u kojima je pružena besplatna pravna pomoć, vrsti besplatne pravne pomoći, te drugim pitanjima od značaja za izvještavanje o radu iz područja pružanja besplatne pravne pomoći.

#### Član 30.

##### (Unutrašnja organizacija)

Unutrašnja organizacija i sistematizacija radnih mjesta Zavoda utvrđuje se pravilnikom, koji donosi direktor Zavoda uz predhodno pribavljenu saglasnost Vlade Kantona.

**Član 31.  
(Sredstva za rad Zavoda)**

Sredstva za rad Zavoda osiguravaju se u budžetu Kantona.

**Član 32.  
(Edukacija kadrova)**

Zavod osigurava kontinuiranu edukaciju kadrova koji pružaju besplatnu pravnu pomoć, radi unapređenja sistema upravljanja i pružanja besplatne pravne pomoći.

**Član 33.  
(Rukovođenje)**

(1) Radom Zavoda rukovodi direktor Zavoda koji se imenuje u skladu sa propisima koji regulišu postupak i način imenovanja direktora samostalnih kantonalnih upravnih organizacija.

(2) Za direktora Zavoda može biti imenovano lice koje, pored općih i posebnih uslova utvrđenih zakonom i pravilnikom o unutrašnjoj organizaciji, ima visoku stručnu spremu – VII stepen, odnosno visoko obrazovanje najmanje prvog ciklusa Bolonjskog sistema studiranja pravne struke koji se vrednuje sa najmanje 240 ECTS bodova sa položenim pravosudnim ispitom i pet godina radnog iskustva na poslovima u svojoj struci.

(3) Direktor Zavoda je naredbodavac za raspolaganje budžetskim sredstvima određenim za finansiranje rada Zavoda.

(4) Direktor Zavoda za svoj rad odgovara Vladi Kantona.

**Član 34.  
(Vršenje dužnosti direktora Zavoda)**

(1) U slučaju da direktoru Zavoda prestane radni odnos ili da nije u mogućnosti obavljati dužnost u dužem vremenskom periodu, Vlada Kantona može imenovati vršioca dužnosti direktora Zavoda, najduže na period od šest mjeseci.

(2) U slučaju privremene odsutnosti, dužnost direktora Zavoda vrši pomoćnik direktora Zavoda, koga on pisanim aktom odredi.

**Član 35.  
(Pomoćnici direktora)**

(1) Pomoćnici direktora Zavoda se postavljaju u skladu sa odredbama Zakona o državnoj službi u Tuzlanskom kantonu („Službene novine Tuzlanskog kantona“, br. 7/17, 10/17, 10/18, 14/18, 8/21, 10/22 i 14/22).

(2) Pravilnikom iz člana 30. ovog zakona se, pored ostalog, utvrđuje broj pomoćnika direktora Zavoda i određuju uslovi za njihovo postavljenje, s tim da za pomoćnika direktora Zavoda može biti postavljeno lice koje pored općih i posebnih uslova utvrđenih zakonom i pravilnikom o unutrašnjoj organizaciji, ima visoku stručnu spremu - VII stepen, odnosno visoko obrazovanje najmanje prvog ciklusa Bolonjskog sistema studiranja pravne struke koji se vrednuje sa najmanje 240 ECTS bodova, sa položenim pravosudnim ispitom i pet godina radnog iskustva na poslovima u svojoj struci.

**Član 36.  
(Državni službenici i namještenici)**

Ostale poslove, osim poslova koje vrše direktor Zavoda i pomoćnici direktora Zavoda, obavljaju državni službenici i namještenici, što se utvrđuje pravilnikom iz člana 30. ovog zakona.

**Član 37.  
(Prava zaposlenika)**

(1) Zaposlenici Zavoda imaju pravo na plaću i druga lična primanja, kao i ostala prava iz radnog odnosa, u skladu sa propisima kojima su ta prava utvrđena za državne službenike i namještenike u kantonalnim organima državne službe.

(2) Pravni zastupnik ima pravo na uvećanje plaće u visini od 20% zbog posebnih uslova rada i specifičnosti obavljanja poslova.

**Član 38.  
(Odgovornost zaposlenika Zavoda)**

Zaposlenici u Zavodu odgovorni su za svoj rad shodno odredbama zakona i drugih propisa kojima je to regulisano za državne službenike i namještenike kantonalnih organa državne službe.

**VI. PRAVNI ZASTUPNICI****Član 39.  
(Pravni zastupnici)**

(1) Poslove pružanja besplatne pravne pomoći iz nadležnosti Zavoda vrše direktor Zavoda i pomoćnici direktora Zavoda, kao pravni zastupnici.

(2) Direktor Zavoda i pomoćnici direktora Zavoda su kao pravni zastupnici nezavisni i samostalni u vršenju poslova i imaju pravo i dužnost da u okviru ovlaštenja datog od stranke, preduzimaju sve zakonite pravne radnje koje su po njihovoj ocjeni u interesu stranke kojoj pružaju pravnu pomoć.

**Član 40.  
(Zastupanje)**

(1) Pravni zastupnik preduzima sve radnje i učestvuje u svim fazama postupka do okončanja postupka.

(2) Pravni zastupnik ne može zastupati više od jedne stranke u jednom predmetu.

(3) Pravni zastupnici mogu biti postavljeni za branioca licu slabog imovnog stanja lišenom slobode, odnosno osumnjičenom ili optuženom, na način i po postupku utvrđenom Zakonom o krivičnom postupku Federacije Bosne i Hercegovine („Službene novine Federacije Bosne i Hercegovine“, br. 55/06, 27/07, 53/07, 9/09, 12/10, 8/13, 59/14 i 74/20).

**Član 41.  
(Obaveza čuvanja službene tajne)**

(1) Pravni zastupnik je dužan da pruža besplatnu pravnu pomoć savjesno i stručno u skladu sa ustavom, zakonom i drugim propisima.

(2) Pravni zastupnik je dužan da čuva kao službenu tajnu sve što je saznao ili mu je stranka povjerila, izuzev ako je u svojstvu branioca oslobođen ove obaveze na osnovu izričitog ili prećutnog odobrenja stranke, kao i u slučajevima kada je branilac, a posumnja da predstoji izvršenje težeg krivičnog djela ili kada se pokrene parnica radi namirenja troškova i izdataka koje je stranka prouzrokovala Zavodu lažno prikazujući svoje imovno stanje, a u cilju osiguranja besplatnog zastupanja.

(3) Službenu tajnu iz stava (2) ovog člana dužni su čuvati i drugi zaposlenici koji rade ili su radili u Zavodu.

**Član 42.  
(Razlozi za odbijanje zastupanja)**

(1) Pravni zastupnik će odbiti odbranu i zastupanje u krivičnom postupku:

a) ako je lično oštećen, odnosno ako je bračni ili vanbračni partner oštećenog ili tužioca, njegov srodnik po krvi u pravoj liniji, u pobočnoj liniji do četvrtog stepena ili po tazbini do drugog stepena;

b) ako je pozvan kao svjedok u istom predmetu;

c) ako je postupao u istom predmetu kao sudija ili tužilac;

d) u drugim slučajevima predviđenim posebnim zakonom.

(2) Pravni zastupnik će odbiti zastupanje u parničnom postupku:

a) ako je pružao besplatnu pravnu pomoć suprotnoj stranci u istom predmetu ili po bilo kom pitanju vezanom za taj predmet;

b) ako je suprotnoj stranci u istom predmetu besplatnu pravnu pomoć pružao drugi pravni zastupnik;

c) ako je postupao u istom predmetu kao sudija, tužilac ili kao ovlašteno službeno lice bilo kog organa;

- d) ako on ili drugi zaposlenici Zavoda imaju lični interes koji je, ili može biti, u sukobu s interesima zastupane stranke;
- e) u drugim slučajevima predviđenim posebnim zakonom.

#### Član 43.

##### (Otkazivanje punomoći)

(1) Odmah po saznanju za postojanje razloga i okolnosti iz člana 42. ovog zakona, pravni zastupnik je dužan otkazati punomoć stranci.

(2) Po otkazivanju punomoći pravni zastupnik je dužan u periodu od 30 dana nastaviti pružati pravnu pomoć, ako je to neophodno da se od stranke odkloni kakva šteta, osim ako stranka nije imenovala drugog zastupnika ili se preduzimanju tih radnji izričito protivi.

(3) Pravni zastupnik nije dužan postupati u skladu sa stavom (2) ovog člana ako stranka otkáže punomoć, ali je dužan u momentu otkazivanja punomoći u pisanoj formi obavijestiti stranku o svim relevantnim rokovima kao i zakazanim terminima u konkretnom predmetu.

#### Član 44.

##### (Dužnosti pravnih zastupnika kao branilaca)

(1) Pravni zastupnik kao branilac tokom krivičnog postupka mora, zastupajući lice lišeno slobode, odnosno osumnjičenog ili optuženog, preduzimati sve neophodne radnje u cilju utvrđivanja činjenica i prikupljanja dokaza koji idu u korist lica koje brani, kao i zaštite njihovih prava.

(2) Prava i dužnosti pravnog zastupnika kao branioca ne prestaju u slučaju opoziva, sve dok ih sudija odnosno vijeće ne razriješe te dužnosti.

#### Član 45.

##### (Obaveza informisanja)

Pravni zastupnik je dužan da informiše stranku o preduzetim radnjama u postupku i o svim drugim činjenicama relevantnim za tok i ishod konkretnog postupka.

#### Član 46.

##### (Zabrana obavljanja drugih poslova)

Pravni zastupnik ne smije obavljati dužnost, djelatnost ili biti u položaju koji dovodi do sukoba interesa sa njegovim dužnostima, i to:

- a) obavljati dodatnu djelatnost za koju se plaća naknada, osim u slučaju kada je to posebno odobreno;
- b) biti član upravnih i drugih odbora političkih stranaka i ne smije slijediti uputstva političkih stranaka.

#### Član 47.

##### (Obaveze i dužnosti pravnih zastupnika)

(1) Pravni zastupnik ne smije:

- a) dozvoliti da porodični, društveni, politički i/ili drugi odnosi utiču na vršenje njegovih službenih dužnosti;
- b) upotrijebiti ili se koristiti ugledom Zavoda da ostvari svoje privatne interese ili interese drugih i
- c) postupati ili dopustiti drugima da postupaju na način da se stiče utisak da je bilo ko u posebnom položaju i da može vršiti uticaj na pravne zastupnike ili na ishod postupka.

(2) Pravni zastupnik je dužan postupati po svim predmetima koji su mu dodijeljeni, osim u predmetima u vezi kojih se zahtijeva njegovo izuzeće.

(3) Pravni zastupnik je dužan da kontinuirano radi na usavršavanju i povećavanju nivoa svoje profesionalne stručnosti za obavljanje poslova pružanja besplatne pravne pomoći.

(4) Pravni zastupnik je dužan preduzimati radnje u vršenju odbrane ili zastupanja na krajnje profesionalan, strpljiv i dostojanstven način, kako prema nosiocima sudske i tužilačke funkcije, tako i prema ostalim službenim licima, strankama koje

zastupa i protivnim strankama, svjedocima, punomoćnicima i drugim licima sa kojima službeno kontaktira.

#### Član 48.

##### (Način postupanja pravnih zastupnika)

(1) Pravni zastupnik ne smije pokrenuti, dozvoliti niti uzimati u obzir razgovor sa sudijom bez prisustva suprotne stranke u vezi sa postupkom koji je u toku, osim na zakonom dopušten način.

(2) Pravni zastupnik će svoje poslove obavljati brzo, efikasno i pravično, uz poštovanje prava svih uključenih strana da budu saslušane i da se njihovi sporovi riješe bez nepotrebnog odgađanja ili troškova.

#### Član 49.

##### (Angažovanje drugih lica)

(1) Pravni zastupnik može u pojedinom postupku angažovati ili zatražiti angažovanje vještaka, sudskih tumača i drugih lica, kada je to neophodno za vršenje odbrane ili zastupanja, samo na osnovu prethodnog odobrenja direktora Zavoda, osim u slučaju kada to objektivno nije bilo moguće prethodno pribaviti.

(2) Direktor Zavoda neće odobriti angažovanje lica iz stava (1) ovog člana, ukoliko ocijeni da njihovo angažovanje nije neophodno za uspješnu odbranu ili zastupanje stranke.

(3) Pravni zastupnik je dužan da predlaže ili angažuje lica iz stava (1) ovog člana sasvim nepristrasno, rukovodeći se isključivo njihovom stručnošću i iskustvom u obavljanju poslova za koje se angažuju.

#### Član 50.

##### (Obavijest o nedozvoljenom ponašanju)

(1) Ako neko dođe do saznanja da je pravni zastupnik ili drugi zaposlenik Zavoda postupio suprotno zakonu, što ga čini nepodobnim za vršenje poslova u Zavodu, ima pravo i dužnost da o tome obavijesti direktora Zavoda.

(2) Pravni zastupnik koji posjeduje informaciju o mogućem kršenju ovog zakona od strane drugog pravnog zastupnika, dužan je o tome obavijestiti direktora Zavoda, a ukoliko se ta informacija odnosi na direktora Zavoda, onda je dužan o tome obavijestiti ministra, koji preispituje osnovanost primljene informacije i o tome eventualno obavještava Vladu Kantona.

#### Član 51.

##### (Međusobna saradnja nadležnih organa)

(1) Zavod uspostavlja saradnju s drugim kantonalnim zavodima za pružanje pravne pomoći, Kancelarijom za pravnu pomoć Brčko Distrikta Bosne i Hercegovine, Centrom za pružanje pravne pomoći Republike Srpske Bosne i Hercegovine, te udruženjima i fondacijama registrovanim za pružanje besplatne pravne pomoći u cilju razmjene informacija i prakse u području pružanja pravne pomoći.

(2) Zavod saraduje s centrima za socijalni rad, nadležnim ministarstvima, jedinicama lokalne samouprave i drugim tijelima, u cilju praćenja prakse primjene zakonskih odredbi u određenim područjima i analize potreba građana da svoja prava i obaveze propisane tim zakonima rješavaju uz pružanje besplatne pravne pomoći.

### VII. NADZOR NAD PRIMJENOM ZAKONA

#### Član 52.

##### (Nadzor nad primjenom zakona)

(1) Nadzor nad provođenjem odredaba ovog zakona vrši Ministarstvo pravosuđa i uprave Tuzlanskog kantona.

(2) U cilju vršenja nadzora nad zakonitošću rada, Zavod je obavezan Ministarstvu iz stava (1) ovog člana dostavljati polugodišnji i godišnji izvještaj o radu.

**VIII. PRIJELAZNE I ZAVRŠNE ODREDBE****Član 53.****(Donošenje pravilnika)**

Pravilnike iz člana 9. stav (1) i člana 28. stav (5) ovog zakona, ministar će donijeti u roku od šest mjeseci od dana stupanja na snagu ovog zakona.

**Član 54.****(Započeti postupci)**

Postupci započeti na osnovu odobrene besplatne pravne pomoći prije stupanja na snagu ovog zakona, kao i odlučivanje o zahtjevima za besplatnu pravnu pomoć podnesenim prije stupanja na snagu ovog zakona, završit će se po odredbama zakona po kojima su započeti.

**Član 55.****(Prestanak važenja Zakona)**

Danom stupanja na snagu ovog zakona prestaje da važi Zakon o pružanju pravne pomoći („Službene novine Tuzlanskog kantona“, br. 10/08, 11/17 i 22/21).

**Član 56.****(Stupanje na snagu zakona)**

Ovaj zakon stupa na snagu osmog dana od dana objavljivanja u „Službenim novinama Tuzlanskog kantona“.

BOSNA I HERCEGOVINA  
-Federacija Bosne i Hercegovine-  
TUZLANSKI KANTON  
S K U P Š T I N A

Broj: 01-02-425-9/22  
Tuzla, 30.10.2023. godine

PREDSJEDNIK  
SKUPŠTINE TUZLANSKOG  
KANTONA

Žarko Vujović, v.r.

**979**

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 30.10.2023. godine, donosi

**Z A K O N****O IZMJENAMA I DOPUNAMA ZAKONA O POLICIJSKIM  
SLUŽBENICIMA TUZLANSKOG KANTONA****Član 1.**

U Zakonu o policijskim službenicima Tuzlanskog kantona – prečišćeni tekst („Službene novine Tuzlanskog kantona“, broj: 7/22) u članu 5. u stavu (3) riječi „Uredba o jedinstvenoj policijskoj uniformi u Federaciji“ zamjenjuju se riječima „Uredba o jedinstvenoj policijskoj uniformi policijskih snaga u Federaciji („Službene novine Federacije BiH“, broj: 60/23)“.

**Član 2.**

U članu 10. u stavu (1) tačka 12. mijenja se i glasi:  
„12. obrada ličnih podataka, uključujući i posebnu kategoriju ličnih podataka i vođenje evidencija;“.

**Član 3.**

U članu 27. stav (2) mijenja se i glasi:  
„(2) Ukoliko nije drugačije određeno ovim zakonom, sredstva sile kao što su: fizička sila uključujući borilačke vještine, sprej sa nadražujućom materijom, palica, sredstva za vezivanje,

uređaj za prisilno zaustavljanje osobe ili vozila, hemijska sredstva, službeni psi, vođeni topovi, specijalna vozila, specijalne vrste oružja, eksplozivne naprave, vatreno oružje i sredstva za nasilno otvaranje i ulazak u prostoriju, mogu se upotrijebiti kada je to potrebno za zaštitu ljudskih života, odbijanje napada, savladavanje otpora, te sprečavanje bijega.“

**Član 4.**

U članu 28. u stavu (1) riječ „ozbiljno“ zamjenjuje se riječju „očigledno“.

**Član 5.**

U članu 33. u stavu (1) riječi „uključujući i lične podatke“ zamjenjuju se riječima „lične podatke, uključujući i obradu posebne kategorije ličnih podataka“.

U stavu (2) u prvom redu iza riječi „ličnih“ dodaju se riječi „i posebne kategorije ličnih“, a iza broja „49/06“ dodaju se brojevi „76/11 i 89/11“.

**Član 6.**

U članu 34. u stavu (1) iza riječi „ličnih“ dodaju se riječi „i posebne kategorije ličnih“.

**Član 7.**

U članu 44. iza stava (4) dodaje se novi stav (5), koji glasi:  
„(5) Odobrenje za obavljanje dodatne aktivnosti uz naknadu iz stava (1) tačka b) ovog člana vrši se u skladu sa propisom koji donosi ministar, na prijedlog direktora Uprave policije.“

**Član 8.**

U članu 48. u stavu (1), tačka 2. mijenja se i glasi:  
„2. U činu mlađeg inspektora – kao drugi nivo pristupanja za kandidate sa najmanje VII stepenom stručne spreme ili završenim prvim ciklusom visokog obrazovanja na akreditovanoj visokoškolskoj ustanovi koji se vrednuje sa minimalno 180 ECTS bodova.“

**Član 9.**

U članu 52. u stavu (1), tačka c) mijenja se i glasi:  
„c) minimalno IV stepen školske spreme za čin „policajac“, a za čin „mlađi inspektor“ VII stepen stručne spreme ili završen prvi ciklus visokog obrazovanja na akreditovanoj visokoškolskoj ustanovi koji se vrednuje sa minimalno 180 ECTS bodova;“.

**Član 10.**

Član 57. mijenja se i glasi:

„Član 57.

(Pravila postupka izbora)

(1) Kandidati koji ispunjavaju opće i posebne uslove, te koji su podnijeli svu traženu dokumentaciju, imaju pravo pristupa testiranju.

(2) Prijave kandidata koji ne ispunjavaju uslove iz stava (1) ovog člana Komisija za izbor će odbaciti i sačiniti posebnu listu tih kandidata koju će oglasiti na oglasnoj ploči i internet stranici Ministarstva.

(3) Kandidati koji ispunjavaju uslove iz stava (1) ovog člana testiraju se po navedenom redoslijedu:

- pisani test;
  - test fizičke sposobnosti;
  - drugi test u skladu sa propisom iz člana 56. ovog zakona.
- (4) Kandidat koji ne pristupi ili ne zadovolji jedan od testova iz stava (3) ovog člana isključuje se iz daljeg postupka izbora.

(5) Komisija za izbor:

a) utvrđuje sadržaj testova iz stava (3) ovog člana, u skladu sa propisom iz člana 56. ovog zakona, vodeći računa da test fizičke sposobnosti uvažava tjelesne sposobnosti uzrokovane biološkim razlikama između muškaraca i žena;